

Щёкат ропатайл ораңна вул нэмна юкантса



Сергей Егорович Перчеда «Заслуженной работник рыбного хозяйства РФ» почётной звание нэмна юкантса.

Ям айкелна ёхатсаю! Охсар похал худ велты предприятие Харсойм курт рыбоучасток прибрежной лов худ велты ху Сергей Перчеда «Заслуженной работник рыбного хозяйства РФ» почётной звание нэмна юкантса. Щимащ партапса нэпек Россия хон мув Президент Владимир Путин хансас.

Худ велты тахайна Сергей Егорович мули нидъёң молтас тал ропытал. Щи арат тал сыс щимащ щёкат ропата сэмлал лап тохарман верта веритлалды.

Ропатайл сэңк самаңтат тайдалды, итта, энамты нявремат онттал, худ велты пиллална холантман тайла. Щи арат тал сыс мойлапсы па ишакты нэпекат тайл.

«Пон ласката хаста масл. Касң нэңху пон ласкаты тахайдна метка тайл, понл дэвасы тахайна ант ёхаттал ораңна. Напатман нил привяз тайлам, касң холамсат метра хуват. Товына, хонты овал так, щёс молтас напатлу, щиты айлта овал сус педа аямтална, кат щёскем пон напатта питал.

Имоса порайна щимащ так ватна питсам. Номассам ил хампаллайм. Щиты айлта ватна вуты ласкасайм. Якар ласкасам, пондам нёл эвалт талсалдам. Оллийл щиты...

Хоты карра щёкат ос худ велта, итта па щиты. Мотораң хапат кепа этсат. Парта лавалтта ант масл, карра хоты лупна парта лавалсу, итта анта, моторан парта мантал ораңна аматлэн, щиты айлта тулайн.

Итта худ велты ях кутна дэвасы нэңху антам, топ хой самална щивер такан тайлалды хыщсат. Па щимащ нэңхэт, хой олмал хуват топ худ велман ос, вул пелакки ювман па ропата педа мули ант манал», – Сергей Перчеда лавас.

Итта, лув пилэлна Харсойм рыбоучастка, щимащ щёкат ропата верман па план мийман нидъёң молтас нэңху ропытал.

ЩИ томпына Сергей Перчеда контрольной лов хоңа пилтащыл, наука элты Ас хоңа олты тынаң худ онттада нятал.

Вера Лонгортова
хансам потар

Ямас онттыды нявремат стипендия сытта веритлат

Щимащ стипендия ясна пайтты ораңна камантсы категория дэщатман ол. Ямал мув ашкодайт етсам нявремат, хой очно колледжа па вузатан онттыл, алаң курс эвалт касң тылащ ёң щёрс солкувая сохпатата питлайт. Щи ораңна алаң сессия ямас етсата масл па исследовательской, интеллектуальной маса творческой достижение хыщам кат тал сыс тайта.

СВО хоңа олты нэңхэт нявремат па шоши мир нявремат ораңна щирл условие дэщатман ол. Лувилал щи стипендия ораңна, топ алаң курс эвалт ямас онттыда масл «отлично па хорошо». Холна, Ямал мув ашкодайт етсам нявремат кимет курс эвалт ищи щи категория хоңа лоңсат, топ лувилал мевал пос тайта масл па очно вул та-

Ямал мувна курк тылащ 28-мет хатл маса вул таха педа па СПО хоңа онттыды студентат, хой ямас онттыл губернатор нэмпи стипендия ясна пайтты ораңна заявление ханста веритлат. Щи ораңна нэпеклал онттыды тахайдална, округ департамента мата веритлалдал.



Хор: Вера Лонгортова

хайна онттыда – образование, леккар вер па культура хоңа.

ЩИ томпына, Волноваской муниципальной округ нявремат ищи щи стипендия вута веритлат, хой Россия хон мув вузата ямас онттыл.

Хой ашкода мевал пос пилна етсасы па губернатор нэмпи стипендия сытас, «Ориентир Ямала» программа хоңа лоңта па пилтащита веритлат. Щи онтасна, лув вул курсата онтыман практика манта питлат па муң округуна ропата канста нятлайт.

Щимащ нятапсы Ямал мувна губернатор Дмитрий Артюхов 2020-мет тал эвалт дэщатас, щи арат тал сыс щёрс молтас нявремна ясна пайтса.

Вера Лонгортова хансам потар

Хыщам тал сус ар хаттэл нятса

Хыщам 2025-мет тал сус 5 200 касдыман яңхты хаттэл нятасына масайт. Аратэдна 3 300 молтас ол, ветъёңкем нюки, ветсаткем кор па керосиновой лампа, ветсат молтас метра пон па кат щёрс нидсат партона понам даращ.

Мет артан щимащ нятасына мийм хаттэл Приуральской, Тазовской па Ямальской район эвалт оллат. Ёрвош районна тунял 340 хаттэл нятса. Кадаң нэңхэт па хул велты ях мет масты пормасатна масайт: нюкет па паршин, корат па хат лаңал даңты кортэтна, тут маты пормасатна, понатна, партона даращатна, ной, сахлат, корлуңкат па па пормасат. Щи томпына, нидхощъёң хаттэл элты, хой тут маты генератор лув охална лотас, па хутхощъёң хаттэл – бензопила лотас, паса-там охлад парта сохаптасайт.



Хор: ЯНАО губернатор пресс-служба

«Ялап тал тылащ 1-мет хатл 2026-мет тал эвалт нятасы перечень вудамса – касщ хаттэл кат спасательной жилетан мата питда. Щи томпына нятасэт элатсайт: тут йиңк ораңна катхощъёң щёрс па генератор ораңна хольмаң

щёрс маса. Тампус мули хольма хаттэл йилап мера хуват хольмаң щёрс аратна ясна пайтсат», – Ёрвош район Овс мув шоши мир па сельской хозяйство пидна ропытты волаң специалист Иван Сандрин лавас.

Мет алаң хаттэл Ёрвош район эвалт, хой щимащ нятасына маса – Вячеслав па Юлия Лонггортонан нидмет Мужевской тащ эвалт. Нид йик энмалдаңан, ропытты талдан па яха ки понман, аратэдна 32 талды хайдат.

«Талан муң Муже эвалт сат километра хуватна касдылу, луңан мет па хув. Щитна тал сус, ты, муң холам пус топ ёхтыдыта веритлу. Щиты похална ёхтыдытэв порайна, дытыт лотты томпына, иволап нятасы пормасат вулу. Муң хаттэлу ораңна щит сэңк ям нятат», – Вячеслав Лонггортон лавас.

Ямал мувна касдыман яңхты хаттэлат элты маты нятасы 2017-мет тал эвалт ропытал. Тампус щи перечень 25 пормас маса энмас.

Вера Лонггортон хансам потар

Ёхды маты охат

СВО хося улты ёх па ар няврэм тайты хоттэлат няврэмат уталтапсаеда посатты охлад ёхды сохаптадайт. Округеван си няврэмата заявка нэпек ай кер тыдась олаңмет хатл унты китты мосал.

Энамты ёх си нётопса кат категория хуват щитты верытлат: вузатан па СПО сирн уталтыты СВО ёх няврэмат па СПО сирн ар няврэм тайты семьяйт элты округеван уталтыты энамты ёх.

Си программа хуват вузатан очной сирн уталтыты няврэмат катсот сёрс солкува унты ёхды сохаптадайт.

Техникуматан, колледжтан ар няврэмаң хоттэл элты эвет-похат па военнослужащий семьяята луңтасты няврэмат компенсация охан па малайт. Уталтапсайд сохаптаты охал ураңан, уталтыты энамты хоята округеван етшаты специальность хуват хулам тал молтас рупитты мосал.

Симась программа 2023-мет тал элты манал. Си сус нийлсот няврэм нётопса ох щитсат. Ямал депобразование сайт хося лэсятты нэпекат вантты рахал. Холна курк тыдась хольмаң педа нийлмет хатл унты округ куся именной стипендия щитты ураңан няврэмата нэпекат китты рахал. Сохапты охал – яң сёрс солкува кашщ тыдась.

Альбина Тырлина ханшам потар

СВО хося улты хоятат ялап нётопса

2026-мет талан СВО хося улты хоятат Соцфонд реабилитация тахайт унты яңхты билет лэсятты верытлат. Ин си яңхты юшат лув тайты охелан сохаптаты ант мосал.

Там тал элты ямалтыты тахаята китты хоятата, мантэл елпийн, лув охладан ант сохаптаты билет лэсятты мосал. Муйн манты утсидат, симась билет лутты верытлат. Йи порайн, билет луттыйн, лечитты манты нэпек лэсятман ат ус.

Заявление ханшты порайн, катра сирн па ханшты рахал. Посатты охел, ёхаттэл юпийн сохаптада. СВО хося улты хоят, олаң группа инвалидность па па ямалтыты показанийт ки тайл, холна лэты па улты тахайл ураңан охан па сохаптада.

Альбина Тырлина ханшам потар

Хон мув куся грант хося пидтасияты

Округ НКО хося лоңам хоятат хон мув куся Фонд грант кимет касасая касты вохсайт. Хой округев элты си вера пидтасьты утсийл, уталтапсайд манты па заявкайт лэщатты верытлат. Мосты нэпеклад ай кер тыдась хутхосьяңмет хатл унты китты мослат.

Си касасая хон мув кашщ регион НКО хося лоңам хоятат пидтасьты верытлат. Ихосьяң направление хуват проектат китты рахал: ямалтыты верат, социальной обслуживание па хоятат нётопса, исторической память шавиты верат па патриотической воспитание, гражданской общество институтат елды туты

сират па энамты ёх нётопса па па отат. Сит элты касася положенийин Фонд официальной сайтан луңатты рахал. Нох питты хоятат уйт лор тыдась олаңмет хатл элты нопса понам вердал тыйлты верытлат. Сит элты ЯНАО куся пресс-служба ясаң верас.



Хор: Сергей Зубков

«Округ губернатор грант касасаята китты хорпи заявка там касасая мосмитал. Пидтасьты хоятат округ сайт хося уталтыты ураңан понам нэпекат вантты верытлат. Сита антом туп хоты кашщ раздел нэпекат туңа-сира лэсятты мосал, холна письма шаблонат па чек-нэпекат понман улдат. Хоты туңа-сира лувилал лэсятты, сита вантаты. Хой инсясапсайт тайл, специалистат элты лэрапты рахал», – «Гранты Ямала» АНО куся ху Хизри Алхаматов ясаң верас.

Заявка китты ураңан, Созидатели.рф федеральной портал хося ханшлтантыты мосал, онлайн-заявка лэсятты па китты. Нох питам НКО ёх ущ тыдасян ястадайт.

Альбина Тырлина ханшам потар



Хор: Андрей Ткачев

Ханты мира луңтарат хансам ху

Тампус Роман Прокопьевич Ругин сэмна питам хатдал эвалт 87-мет талдунал лолан постас. Лув ялап тал тылащ нилъёң педа аламет хатлна 1939-мет тална Питдор куртна сэмна питас. Амэл па ащел олман хуват хул велпасламан осан. Лапатмет класс етсамал юпина, Пулңавт васна педагогической училищя онттыда манас.

Щи юпина Роман Прокопьевич А.И. Герцен нэмпи Ленинградской государственной педагогической институт етсас. Вул тахайна онтымал юпина, камантсы тал Лорвош район Восяхово курт ашкодая мет алаңна коща лаңкар ху ос, щилта кощя аматса.

Ветъёңкем тал «Ямальский меридиан» журналан главной редактор ропата верас. Роман Ругин олмал хуват ар луңтар па потар соп ханты па руц

ясаңна па хансылдыйс. Тохал ропатайдал па мув мир ях ясаңна толмащман олат. Кат луңтарл мировой поэзия антология хоца лоңсаңан.

Малай нэңху сэрэк хансты номасна ёхатла, хоты щит ёхатл? Щи инщасапса хоца Роман Прокопьевич тамиты лавас: «Ай олмем порайна, ма сэңк ар монщ, йис потар холсам, аса номасна понман тайсалдам. Щи



юпина охамна потрат этсат, ма па лувидал нэпек элты ханссадам».

Ант ярэматы ораңна, Роман Прокопьевич Ругин сэмна питам хатл педа Пулңаватна, лув нэмадна понам нэпек луңатты хатна уйтантопса ак тыдыса. Тамхатл, лув муң пилэвна антам кепа, лув хансам луңтардал номман тайдайт, луңатдайт. Аратад мирна шеңк яма уйтдайт.

Вера Лонгортowa
хансам потар


Сорашак айкел мощатты ураңан

«Лух Авт» газета кашң лапат йи пуш этдыйл. Тухал ишан, ёхаттал унты тадаң лапат хащал. Щи веран, сорашак айкелат мощатты ураңан, нынан мосал «Лух Авт» поныдыты айкелат «ВКонтакте» па «Одноклассники» хоца мощаттыты.

Щи ураңан там QR-код мохты лоңаты, па муң верыдыты айкелдува ханщлтыяты. Кимет веран, айкел луңатты тумпийн, щита рахал ясаң ханшты, потран сама ки рахас – пос понты.

Муң па, нын вантам айкелдан элты ищи нопсэв тыед-тохел поныдылэв, вантлэв – мата айкелат па муй элты хоятат луңатты лаңхалат.

Тумтак ёшна, тумтак курна ханты мир улапсаев ияха понаман елды тулэв, ханты мир ясең шавилэв!



ОБЪЯВЛЕНИЕ

Там QR-код хуват лоңаты па вантаты, муйсыр нётопсайт СВО хоца улты мохета мадайт. Щи тумпийн нэңдала, няврэмдала, аңкидала па ащидала ищи нётопса вуты рахал.



СЛУЖБА ПО КОНТРАКТУ В ВС РФ

ПОЛНАЯ ИНФОРМАЦИЯ ПО ТЕЛЕФОНУ
+7 (902) 816-11-90
+7 (34922) 3-98-08
ЗВОНОК ПО РОССИИ БЕСПЛАТНЫЙ

ВРЕМЯ ДЛЯ ВАЖНЫХ РЕШЕНИЙ!

КОНТРАКТНАЯ СЛУЖБА
6 700 000 Р
ЕДИНОВРЕМЕННАЯ ВЫПЛАТА
4 000 000 Р

ПРИ ЗАКЛЮЧЕНИИ КОНТРАКТА НА ЯМАЛЕ

Прибывающим из других регионов возмещаются затраты на проезд от места проживания до г. Салехарда. В период оформления проживания в г. Салехарде и 3-разовое питание предоставляются бесплатно.

ОБУЧЕНИЕ:
✓ ОПЕРАТОРОВ БЕСПИЛОТНЫХ ЛЕТАТЕЛЬНЫХ АППАРАТОВ
✓ ТАКТИЧЕСКАЯ БОЕВАЯ
✓ МЕДИЦИНСКАЯ ПОДГОТОВКА

3 600 000 Р ЕДИНОВРЕМЕННО ОТ РЕГИОНА
ДО 120 000 Р СЕРТИФИКАТ НА РЕАБИЛИТАЦИЮ

400 000 Р МИНИСТЕРСТВО ОБОРОНЫ
ЗАКЛЮЧЕНИЕ ВОЕННОГО СОЦИАЛЬНОГО КОНТРАКТА

ЕЖЕМЕСЯЧНЫЕ ВЫПЛАТЫ ПРИ НАХОЖДЕНИИ В ЗОНЕ СВО

ОТ 225 Т.Р

Ханшам потардал хув ат луңа

Олаң рупатайдал
газетайн понман усат

Антонина Егоровна Сязи хувн ханшты пйтас. Монсьдал, потардал олаңан «Дух Авт» газетая китыдысды, сита поныдысайт. Си юпийн нэпекат этсат. Хоты си вер тыйс, ясаң тус: «Каматса тал потардам, луңтардам газетая китыдысдам. Си пора сис ям доват акмас, нэпек арата йис. Сялта манэма потрат ханштыя умась хорпия йис. Ханшты елды питсам.

Имолты порайн звонитсайм па ястасайм, сикем ям потрат газетая ханшдан, ивеван ханшидыя. Сикем самеман ям,



нумасти питсам, катра порайн ун асем, омем япсыена монсь монсидысқан. Нэпека лувилал ханшты питсадам. Омем монсь арат арыдыйс, лувилал па

Пулцават вошн ханты ёх кутан луңтапат ханшты хоятат улдат. Ардал арыты хоятатан арыдайт, уйтантопсаятан луңтардал луңатдайт, русь па ханты ясаңан ханшам нэпекдал мира этадтыдайт. Там лопасан там мосванан ханты ясцев шавиты па елды туты актыдыйм ханшты хоятлүв элты потрэм тулдем.

нумадмисдам, хидылама арыдысдам.

Нийдмет классан ма газета верты редактора пирысайм. Ма сирэман версэм. Сита фельетонат, карикатурайт ханшсам, молты ай луңтарат поныдысам. Хон Петра воша уталдыты манти утсисам, ант мантсам. Пулцават вошан уталдысам. Асем кашаңа ювмал порайн, ур хотан лувела нётман, касдыман яңхсам. Ханшты хордам хутмет класс элты ант ханшидысдам.

Пенсияя манти юпийн, ялпа ханшты хордам монсьлама лэсятты питсадам. Полина хилэм ханты ясаңан век ант потартал, русь ясаң толмашам ханты монсьлам па ханшам хордам онтасан мосаң нэпеклам луңатты питад. Там йисан няврэмат па ситы нэпеклүв ант луңатлат, мосаң ситы ханты няврэмлүв рут ясцев педа керладат па уталдыты питлат», – Антонина Сязи ястас там манти верат элты.

Елена Алексеевна Шульгина Асов курт элты. Арат, луңтарат ханшал. Кашң хоят, энамты порайд элты молты нумал. Елена Алексеевна ай улмал пора элты каматса ясаң ястас: «Ма ун асем ар монсь, арат уйтас. Аңқаңкем хув ус, сот кат тал унты. Аңкем-асем па ар монсь уйтсаңан.

Ма антом шеңк алаң ханшты питсам. 2020-мет талдан Асов куртаң арат арыты нэңат

Хоты олаң арал тыйс

яха уйтантысат, манэм вохсэл. Группаел «Лапат эви» нэман понтсэл. Арыты питсат, туп муй арыты, ант уятсат. Любовь Романовна Кондыгина ясаң верас, хой мосаң арат ханшты верытал. Каматса ар лувилала ханшсам. Си порайн си олаң арат тыйсат. Олаң арэм хилэма

юкантсэм. 2019-мет тада пенсияя мантсам. Си талатан Ём-вошан «Мелодии хантыйского слова» нэпек этас. Тохи ма ханшам луңтардам понман улдат».



Хор: Альбина Тырлина



Сама хойты луңтарат

Там йисан ханшты хоятлүв хорам улты мувев, ван рутдал па Волаң па там йисан манти лялян удам хоятдал элты потрат па луңтарат тайлат. Кашң симась луңтар муң самева хойл. Симась хоятат кутан – Валентина Петровна Лонгортлова.

Там мосванан «Сам лэрдам. Струны моей души» нэпекал этас. Сита «Микул» поэма понман ул. Лув кашң аңкия, хой похал Волаң лялян парас, постасды. Уйтантопсайн Валентина Петровна сидта потар шупие луңтас. Нын па луңтадан.

Донц хорпи нови ун хотңат
Куртэл нумпийн дарылат.
– Нумалта йилат, – лув далтмас,
– Похием манэм мув элты...

– Мосаң па дыдал... лув...этас?
Муй айкел, войиет, тусты? -
Лув, нохды вантман, потартал,

Матты ки войладан хулда:
– Похием хун па ёхатал,
Лув сэма питама мувала?

Сэм йиңкдал этман, тыштамтас,
Щалта па шитаман ястас:
– Мосаң па, яна, лув... дылаң...
Ант уйтас... похием... малаң.

Ун ими кашң товийн
Нык, ёхан сыда охадал.
Палладан кашң сый худал,
Матты ки похиел шушал...
Лув, ныкды вантман, хув дойд,
Давартан далтман, тыштыйл.

Тлайт, елды мир кутан тулайт

Русь ясаң кератты
тарнаң арат


Геннадий Павлович Кельчин рупатайл хуват ар ханты хоят пидан уйтантыйс, монсят, потрат, арат ханшилдыйс. Хасям талатан няврэмат кеша русь монсят, луңтарат ханты ясаң толмащас. Симась ольпаң, хорам нэпекат няврэмата каш вантты па луңатты.

Ин па тарнаң арат пидан рупитал. Ун номас тыйлты вераң элты ситы ястас: «Ханты хоят шеңк ар монсь, ар, камн хорпи потар тайл. Сит иса ханшты мир кутн нопса вертыя мослат. Холна тарнаң арат улдат. Русь сирн – героический эпос. Ситат русь рутатан ант уятлайт.

Номас вуйдыман тайдам, си арат русь ясаң толмащтыя. Русят сит луңатлат ки, ясталад, ханты нэш иси нопсаң, иси нэш ханшты хошад.

Муң катра тэдан нэпек ханшты, нэпекев элты луңатты хошсув. Ситэв ар пора хасям юпийн хол ёрэмалэв. Катра лясам хоятлүв хошам муван улмедан, ищи тамиты кев хотат тайсат, арыты, нэпек ханшты хошсат. Сялта па Овс мув педа манмев юпийн, си верат иса хол ёрэмасайт. Вудэт энмалты питсув, мет шопаң, там иськи муван муң мирэв верат шавилүв. Куш кеша онтап вуйи. Си онтпен дыпийн, муй хорпи иськи ат ул, няврэмие иси па энмал. Аңкедан лапатда, энмалда. Па мират ки вудан, симась онтап ант тайлат.

Си ханты ун нопсат руся алыты утсидам, хутсы ант ат лакатдаюв. Сикуш ун нопсат тайдам, юрэм шимал. Шеңк ун вер, там тарнаң ар толмащтыя. Кат ар ул: «Лух Авт Нёл» элты па «Вусаң Кев шукатам ар». Си арңан русь ясаң пайтты утсидам. Си порайн си уятты питда, хоты ханты мир катра йис порайн ус».

Ешаул ялап нэпекал
этал

Дарья Ивановна Озолова-Чугаевская там мосванан нийлъяң педа ветмет талад постас. Ултад хуват муй арат няврэм кеша нэпек ханшас. Каматса ясаң сит элты ястас: «Ма хус талдан ашкудайн ай няврэмат пидан рупитты питсам, ханты ясаң уталтасдам. Ханты ясаңан нэпекат ант тайсув. Си порайн си мет олаң Азбука нэпекем лэсятты питсэм. Ма пидэман рупитты Наталья Николаевна русь нэ, хорат ханшас. Олаң уталтаты

няврэмдам пидан рупитман, ихосьяң нэпек лэсятсам.

Ма нэман лувилал русь ясаң ант толмащисдам. Сялта ханты ясаңан словарь эсалсув. 1974-мет талдан Ёмвош элты литературной произведенияйт ханшты издательской договоран китсайм. Ханшам нэпекдам хол Роман Прокопьевич Ругин шуңатан вантсайт па луңатсайт.

Там талдан холна йи ялап нэпек этал. Амаматсет лэсятсам. Ма лувилал удтэм сыс актыдысдам».

Ястам йис потрат, амаматсет нумман тайдалды



Евдокия Езиковна Серасхова Приуральской районан ул. Лув аңкел-асел хоса нийлмет няврэм ус. Улапсайл па нэпекдал элты потар тус: «Асем Волаң

ляляң ус. Аңкем-асем иса рут ясаңан потарсат, русь ясаң ант хошсат. Сишан, муң хол ханты ясаңан потарсув. Си порайн телевизор, телефон ант тайсув. Асеван-аңкеван кашң порайн монсян монсилдысаюв, артадаты вератан ястыдысаюв. Асем мир улапса элты шеңк хорамаңа потартыйс. Ма хулатсам па матты ки кина вантсам, хорам хорат этдысат.

Хун айт усув, аңкев иса амаматсет ястыты партыдысув. Хун муй ястаты ант уйтас, муй охада ёхтыдыйс, сит потартас. Пора хайман, хун инсилдысэм, лув муй потартыйс, ант нуммас. Лувела аңкел-асел, аңкаңкел

потартыйм йис потрат, монсят, арат иса нумман тайсалды. Ма па лув ястыдыйм амаматсидал, йис потрлал, артадаты верлаң иса нумлалдам, акатман тайлалдам. Ин няврэмлама, хилылама потарладдам».

Ма нумастэман, симась уйтантопсайт шеңк мослат. Тамаң верат онтасан энамты няврэмлүв мосаң ищиты нэпек ханшты вера катдаслат, ялап ханшты хоятат этлат.

Там йис ханшты хоятлүв, ханты мирэв ураңан ханшам луңтарлад, монсьдал, йис потарлад хув ат хулатлайт па луңатлайт, елды мир кутан тулайт. Ястаты ясаңдал, кашң хоятан опа ат паятлайт.

Юш

Юхат, лыптит кутан,
Ханты ёх ай куртан,
Вотаң, ищки талдан
Сэма ма щипитсам.
Па няврэмат щипан
Энамсам па ёнтсам,
Адаң хушчал порайн
Торна кераптысам.
Ертан лёхитысам,
Вотан муңхасысам,
Ёшан ма щиповалсам,
Юшан хухатдысам.
Турам кимла манал,
Этар хара вордал,
Мосаң, щипюшечман
Ин па щипмандам.

Рут музем

Вуца, вуца, ма рут музем,
Ма мирыйем, ма аңкийем.
Овты Асан ат па манал
Ям потрыйем, ям арыием.
Тата щипят няврэмийет...
Сэмийидал тут лавмийет.
Нёдал катлам нёдаң похем,
Юхдал катлам юхдаң ёхем.
Рут муземан дойидыдам,
Рут мувиюем умашчалэм.
Щимшар катлам кат дохиюем
Ма-са, ма-са лумтыдыдам.
Нёхас хухлам нёхас юшем,
Лаңки хухлам лаңки
пантэм.
Варас щевлаң, щевлаң сый,
Доншан ныда нёхас дый.
Вуца, вуца, ма рут музем,
Ма мирыйем, ма аңкийем.
Овты Асан ат па мандал
Ядпа тыйты мир ёх арат.

Рут ясчём

Ищип матты вулэт
Унт ловатан яңхлат,
Ищип матты хулат
Ас вутатан щеллат.
Ома ясчём,
Манэм щикем умаш,
Ома рут потрэм,
Щит, малы, монщ.
Духсэм кеши иты,
Каврам кур матты,
Матты молшан эңхты,
Ханты ясчём щиты.
Умаш унтэм питу,
Вутаң Асэм иты,
Ун Кев, донщ иты,
Манэм мосал щиты.
Духас ёх лув пилан,
Тэваң Асан овал,
Эви ёшат щипан,
Ясчём, малы, манал.

Духас ёх лув пилан
Тэваң Асан овал.
Эви ёшат щипан,
Ясчём, малы, манал.
Вевтам ёхлув пилан,
Питу палаң рохал.
Курыйл, марыйл, дурыйл.

Тата муң Микуль Шульгин шуңат ханшилдыйм дуңтарат пондув.
Там йисан лув аран арыдылайт. Няврэматан, куш лув сэма пи-
там хатладан дуңтыдылайт. Тухал хоятатан ядпа нумадмилайт,
дуңтыдылайт, оша поныдылайт.



Микуль Шульгин Наталья эвел пилан (щёхар тылащ 1-мет хатл 1999-мет талн).

Хор: Наталья Величко

Ясчём щиты манал.
Щита вой ху ув,
Лэты тутэв рув,
Таща йис лув,
Ма ханты ясчём!

Унт

Тата унтат уңхан авлат,
Ма елпечман тови унт.
Вантлам щиелт, юхат унат,
Еша хащ дыв падча хойлат.
Кутшам эпал куншан
йиншдам,
Доял нохар юх волды
ун милпи.
Сумат юх педя щикем
вантлам,
Эвиан доял, лыпат па росы.
Тамащ унт наң ант па
уятдан,
Ванты ям, куш энамсам
унтан.

Каркам ханты ёх шоши
вантдан,
Щит, малы, муң
хотлув дойлат.

Мави Ас

Восты шипан наман дойдам.
Рут мувиюем умашчалэм:
Ас хумпиет шуляң рапаш,
Юх лыптыет щевлаң умаш.
Тохал таян дыв
щив ваншлат.
Хота наң па ушдан?
Хорам войдам,
тохлаңхопдам
Ас шитам дыв шукатлат.
Сэман ныда ун-ай порат,
Нюрам педя щикем мандал,
Хашат кутан тум
муй щашлат,
Арсыр тураң хоплам сыят.
Овса кердам хорам войдам



Иван Иванович хоттэл хоятал па рутал пилан (1970-мет талн).

Ант па уйтлэд ялап овсэл?
Тата, малы, питал оша
Нопсэм йил эавода, воша.
Щевлаң васыйн щикем
щарылат,
Ведпасан етшаты ёх ай
хопат.
Урты вотвойн ернасат
вордалат,
Щипуйтман тата волаң
панат.
Нопсэм сора хухлас унта,
Тата щипанан кевяң
венш Кев.
Ат па арэма овал Дэв
Каман сыр Ханши, Пищ
па дуңта!
Най нови унт мохты
вордал,
Унтэв олмал нёхалтал,
Этас най, ёхтас май, –
Щит увадтас елан ворча.

Тал унт

Нохар юх унтэм,
Сумат юх унтэм.
Иса лув нови,
Шовар хорпи.

Доншечм волийл
Тылащ новийн.
Вай пат сарыйл
Сосам доншан.

Нови лаңкепан,
Хусат матты похантсат.
Хутладал, волилат,
Соридат тут сэман.

Тата щип тал унт,
Юхдал пар унат!
Вот руван полдайт
Донща донщ пайт.
Унт юш элты,
Этмас нёдан
Хулам хопты
Вулэң уха.

Овас вулы

Ма елпечман вулы,
Донщ хорпи нови.
Нюрам дантаң вой,
Хухалты пасты вой.

Щалта сувем вулам,
Ма щип уха дэллам.
Хув тахая,
Ван тахая,
Ал туп нёхтада.

Донщ кутан вопасла,
Пусча пелда.
Шитак ула, вотэв,
Лап ант олда юшев!

Мун духсэв вулы,
Донщ хорпи нови.
Нюрам мув дантаң вой,
Хухалты пасты вой.

Аллина Тоярова дэщатсалды

Отшам отат элты монц

Имеңан-икеңан улдаңан. Йи эви, йи пох тайлаңан. Шалта, щиңанща, эван йиңка манал.

– Эвийе, йиңк тува.

Похан ёдан ул. Ийикел педа ястал:

– Эвиeman пар хув яңхал? Наң па яңха-са, мана. Эвен омлэпан амуй верал?

Шалта ин ийикел манал. Ийикел манал па, щиңанща:

– Эвие, муй верал?

– Ащие, от, манэм ай похие ёхтас па, тум муй, омлэпан ныда. Нох ант йил.

Шалта, ийикел па, щи вантал, щи вантал. Нумасал: «Эвием похиенан ёхатмал па, эвием хоца муя ант йил?»

– Аңки, наң яңха-са! – ин похал ястал, – катңалан омлэпан амуй верлаңан?

Аңкел ими манал. Аңкел ими манал, щиңанща. Тохи ёхатал:

– Муй верлатан?

– Па мин, – ийикел ястал, – эвиeman похиенан ёхтам па, омлэп элты пох ант йил.

Ин ими вуты манал. Вуты манал, ястал:

– Опиен похиенан ёхтам па, омлэп дыпийн щита, пох ант йил.

Шалта ин ху нык манал.

– Описе, муй похие? Щит лув веншал ат ул? Лув хорасал ат ул? Щита омлэпан ныда. Вуты манаты! Муйн лаңхалты, – ястал, щи хуен. – Вуты манаты. Вуты ант ки манлаты – напрыя вердалдам!

Хотэда ин отат манлат. Вошталды.

– Нын, – ястал, – нюр отшамат! Ош ант тайлаты! – ястал.

– Нын хорпан отшам от каншты яңхдам. Там муван амуй ул, амуй антом?

Лаймал алэмад па манал, щиңанща.

Хув шушас, ван шушас. Имомтына: йи ими хотал элты ким этлийл, ёхи лоңтыйл. Сах кимдал, ким этад – ид паркатладды. Ёхи лоңал, тамиты пох алэмилды.

Тохи ёхатал:



Хор: «ЛА» архив

– Имем ими, муй верлан наң?

– Муй верлам? Хотэма хатл ёхи алдам.

– Хатл наң муй щирн ёхи алдан?

– Па ма, сах понан алдам. Хотл ишни вус ант тайл.

Шалта, щиңанща, ястал:

– Хатл муй щиран алдэн?

Ма ин наңен хатадан верлэм, – ястал.

Лайми шупал алэмад па, щиңанща, ишни вусан вердалды. Ишни вус сэврапладды. Ин хатл ёдан ларыйл.

– Я, имем ими, наң ула, – ястал. – Ма матты отшам от каншты па яңхдам. – Па яңхдам-са, – ястал. – Там муван па отшам отат па уллат педа?

Па манал. Лапат ху хоца ёхатал. Лапат ху хоца ёхатал. Ата йил, олты ошел антом. Ким пелка хой питал – пох килал. Йи хуйл кута дойл, щи дойл, щи дойл.

Йи хуйл кут харашак йил – тохи одал.

– Нын муя щиты олдилты? – ястал.

– Муң, – ястал, – кутлоп ахота ул па, кутлоп ант уйтлув. Кутлоп каншлув.

Кат пелкал сохал ертэпан сэңкапладды па, ин отдал туп олтэд этад.

Шалта ёхи манал. Имел ими хоца хойлийл. Имел ими туп, нёхас вер верман, вой вер верман ишни вусаң хотадан ал опсыдыйл! Ёхи ёхатал, ин отдал ёдан. Ин отдал педа ястыйл:


– Нын хорпан отшам отат уйтыдысам, – ястал аңкел,

ащел, опел педа. – Хой сах кимдал пох алмал – хатл ёхи адал. Тухлат па, – ястал, – кутлоп каншлат. Кутлоп ант уйтлат. Улаты.

Ин имел ими хоца манал. Щи имел ими пилн ин щи ул, таңха щи.

Мария Степановна
Лонгортова монцам монц

Аллина Тоярова нэпека
ханшам потар



СУРГУТСКИЙ
ДИАЛЕКТ

Кат имиҳэн



Хор: Людмила Айвасада

Кат имиҳэн вӑллӑхэн. Њӑксӑн йӑвӑннӑ, Мӑккӑн йӑвӑннӑ кат имиҳэн вӑллӑхэн. Кит қотӑтнӑ вӑллӑхэн. Ти вӑллӑхэн, ъулнам мойӑлтахӑ йӑңқиллӑхэн. Ти вӑлтыннӑ, ӑй латнӑ ӑй имил нӑмӑксӑл: «Қӑнтӑқ қопӑ мӑқ қӑрасӑп сӑр? Ӑй мӑта сӑңнам мӑнлӑм қӑта сӑр. Тӑм атӑмнамӑн вӑлтамӑн». Ӑй ныңӑла нӑқ ӑнтӑ йӑстӑтӑх. Панӑ ӑй мӑта сӑңнам ти мӑн. Ахолта пела.

Ти мӑн, ти мӑн, ӑнта қӑв мӑн, ӑнта ван мӑн, ӑй латнӑ иттӑнхӑ йӑх, пӑтӑхлӑтахӑ йӑх. Ӑй латнӑ моқи ол ӑвтӑм ӑңқлӑта йӑвӑт. Ти мӑн, мӑн, ӑй латнӑ тӑм ол ӑвтӑм йух ӑңқлӑта йӑвӑт, панӑ тӑқа ӑй латнӑ сарнам лӑйӑл, тӑқа ӑй қот тӑт омӑсл. Туминт қот омӑсл. Туким мӑт, ӑнтӑлнӑ нӑмӑксӑл: «Тӑқа кӑч мӑвӑли вӑлийат, лӑңлӑм панӑ тӑтты йӑқ». Панӑ йӑқ ти лӑң, йӑқ лӑңмала тӑнӑ ъарӑх вӑнчат йӑқ лӑң. Ӑнтӑлнӑ нӑмӑксӑл: «Кӑч мӑвӑли вӑла!» Йӑқ ти лӑң, тӑми ӑй ими, ӑй пырӑс ими йӑқӑн омӑсл. Тӑми ъӑвӑм:

– Ӑвмӑт Њӑқсӑн йӑвӑн, Мӑккӑн йӑвӑннӑ вӑлтӑ ими, нӑң мӑвӑлинӑ тӑхӑ вуҳӑ? Мӑвӑлинӑ тӑхӑ муьтӑ?

– А лӑв, – ъӑвмилӑл, – лӑв ӑй мӑта тоҳийа мӑвӑ йӑвӑтли!? – йӑстӑл.

Тӑми ӑй ими тӑвӑнӑ лӑйхӑл: ӑй қот пӑлӑк пӑтӑхлӑм, ӑй қот пӑлӑк нӑви. Па онтпӑт йӑмси қот

пӑлӑка қӑтӑлтӑллал, па онтпӑт пӑхи қот пӑлӑка қӑтӑлтӑллал. Тӑп намӑн, тӑвӑнӑ вӑлӑл. Йа тӑт тӑқа ту иминӑ, ту ими ту мӑта вӑрлал тӑвӑ тӑрмӑт, ту иминӑ литӑтат-қулат вӑрӑнты, литӑтат-қулат липты. Панӑ ту ти, ту иминӑ ӑлтӑ тоҳийат вӑри.

Йӑстӑл тӑқа:

– Мӑтӑм, мӑтӑн қунтӑ, ӑлинта, мӑттӑ.

Панӑ ту ими ылӑ ӑлнтӑх тӑвӑ, ту ими панӑ ӑлнтӑх тӑқа. Ӑй латнӑ нӑқ кӑч вӑрӑхлӑх, қунтынтӑ қӑтӑл тӑми. Ту ими қунтынтӑ килмал тоҳи. Тӑми ӑй ту онтӑплалнат нӑрипӑл. Па онтӑп йӑмси қот пӑлӑка қӑтӑлтӑллал, па онтӑп пӑхи қот пӑлӑка. Панӑ тӑқа лӑв нӑқ кил. Ӑнтӑлнӑ нӑмӑксӑл: «Тӑқа нӑқ киллӑм. Мӑнтӑ нӑ вӑсӑм, вӑлӑ». Ту иминӑ ӑс қулат литӑтат липты.



Хор: Людмила Айвасада

Панӑ ту ими лӑватылнам йӑстӑл:

– Нӑң вӑлӑ ныңӑн пил, қуйӑн пил кӑнччахӑ мӑнлӑн, мӑттӑ. Тиминт, – мӑттӑ, – ма қот мулӑм йӑчӑнӑ тӑт лӑк. Йӑмат йӑм кӑрмӑн лӑк. Ту лӑк қӑвит мӑна. Там ти мӑнлӑн, мӑнлӑн, мӑнтаннӑ қӑлӑм тоҳинӑ вихиллӑ. «Ӑ, тӑхнам лӑйла! Мӑн сӑккӑнӑт, мӑн витӑнӑт!» – Нӑң тӑвнам ал лӑйла! Мӑнтӑ вӑра арийала. Қӑлӑм тоҳинӑ вихиллӑ. Панӑ ту мӑнлӑн, мӑнлӑн, тӑм ӑй қота йӑвӑтлӑн. Ту қота панӑ йӑқ лӑңа. Йимӑлмин йӑқ лӑңа.

Панӑ лӑйӑллӑн, йӑмси қот пӑлӑкнӑ тиминт қулаң-парӑң, тиминт чӑмотанӑт омӑслӑт. Нӑң ти чӑмотанӑты ӑй чӑмотан вӑйа. Панӑ кӑмнам кирӑхла, тувӑ. А пӑхи қот пӑлӑкнӑ сиккӑн-сорьӑн сунтукӑт омӑслӑт. Ти сунтукӑт ал ъӑвалтыла. Тит қулӑн-парӑң чӑмотанӑты ӑй чӑмотан вӑйа панӑ

йӑва, панӑ ӑй ту ликӑн қӑвит пӑрхинам тӑхнам йӑва панӑ.

Тӑм ӑй ту йӑтаннӑ, ӑй тоҳинӑ, ӑй тоҳиланӑ ӑтӑ вихилӑлӑ. «Њӑқсӑн йӑвӑн тӑйнӑ вӑлтӑ нӑ, Мӑккӑн йӑвӑннӑ вӑлтӑ нӑ, тӑхнам лӑйла: мӑн сӑккӑнӑт, мӑн витӑнӑт». Ал лӑйла тӑвнам, тӑм йӑвӑттанка, ти чӑмотан ти лӑпӑн ӑвтыйа нӑқ умтӑ.

Панӑ тӑқа ти мӑн. Ту иминӑ ти памили. Ти мӑн, мӑн. Чопӑңқа ат, қӑлӑм тоҳинӑ ти вискӑтӑли:

– Ӑ, Њӑқсӑн йӑвӑннӑ вӑлтӑ нӑ, Њӑқсӑн йӑвӑннӑ вӑлтӑ нӑ! Тӑхнам лӑйла! Мӑн сӑккӑнӑт, мӑн витӑнӑт!

Лӑв панӑ ӑңкрӑмтӑхӑл. Тӑхнам кӑч ӑңкрӑмтӑл – сӑм-пӑлкӑт, лул-пӑлкӑт. Қӑлӑм тоҳинӑ вискӑтӑхли панӑ ӑйнам ӑңкрӑмтӑх. Ӑйнам ӑңкрӑмтӑхӑл, а тӑт чӑйӑ ту қота ти йӑвӑт. Чопӑңка мӑн, мӑн, ту йохлал вихӑм тоҳийа ту мӑн, қӑвӑн-пӑ ӑнтӑм, қота ти йӑвӑт, панӑ тӑқа, ту қота йӑвӑтмал латнӑ ту ими йӑстӑх: «Нӑң тӑм суминтахӑ ылӑтӑчӑк тылӑ, тӑвӑнӑ йӑқ лӑңа!» Лӑв ъарӑх вӑнчат тӑнӑ йӑқ лӑң. Тӑқа тӑт кирӑхлӑл, чопӑңка – йӑмси қот пӑлӑкнӑ қулӑн-парӑң чӑмотанӑт омсилӑт. Па қот пӑлӑкнӑ тиминт сорьӑн сунтукӑт омӑслӑт. Йӑмат сиккӑнӑт тӑва!

(Еллы па ул)

Аграфера Сопочина
ханшсӑллы

Газета «ЛУХ АВТ» Адрес редакции: 629003, ЯНАО, г.Салехард, мкр. Богдана Кнунянца, д. 1, каб. 106 +7 (34922) 4-68-63 E-mail: luh.avt@yamal-media.ru	Учредитель Департамент внутренней политики Ямало-Ненецкого автономного округа (629008, ЯНАО, г.Салехард, пр-кт Молодёжи, д. 9, каб. 708) Газета зарегистрирована Управлением федеральной службы по надзору в сфере связи, информационных технологий и массовых коммуникаций по Тюменской области, ХМАО-Югре и ЯНАО 19 апреля 2012 года Регистрационный ПИ № ТУ72-00558	Тираж 1300 Заказ 42 тз Подписные индексы: на год – ПА700, на полугодие – ПР561 № 6 (1309) Газета вышла в свет 7 февраля 2026г. Подписано в печать 5 февраля 2026г. по графику: 16.00 фактически: 16.00 Газета выходит по субботам Цена годовой подписки 88 руб., в розницу не распространяется	Издатель Департамент внутренней политики ЯНАО (629008, ЯНАО, г.Салехард, пр-кт Молодёжи, д. 9, каб. 708) Отпечатано в АНО «Ямал-Медиа» Юридический адрес: 629003, Ямало- Ненецкий автономный округ, г. Салехард, мкр. Богдана Кнунянца, д. 1, каб. 106 Фактический адрес: 629007, Ямало- Ненецкий автономный округ, г. Салехард, ул. Чубынина, д. 39А	И.о.генерального директора АНО «Ямал-Медиа» Каврук Татьяна Ивановна Главный редактор Яковлева Аллина Кирилловна